

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-31-Z/19  
**Kakanj,** 30.04.2019. godine

**Z A P I S N I K**

**sa 31. redovne sjednice Općinskog vijeća održane 29.05.2019. godine (srijeda) u velikoj sali za  
sastanke Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine, 31. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Adnan Ibrahimspahić, Mejrema Purišević, Izudin Hrusto, Amar Selimović, Safet Šahman, Nadina Kovač, Senad Alajbegović, Namir Talić, Edin Aliefendić i Muahamed Kubat (naknadno pristupio) (**SDA**)

Jasmin Mušanović i Mugdin Gorak (**SBB BiH**)

Rešad Merdić, Mirsad Tursum, Fahrudin Buza, Adisa Škulj i Zerina Kovač (**S BiH**)

Enes Piljug i Ahmed Begić (**SDP BiH**)

Slaven Katičić i Ivica Petrović (**HDZ BiH**)

Elvedin Delić (naknadno pristupio) (**A-SDA**)

Nusret Muslić, Evelin Bitić, Mirnes Merdić i Rizah Haračić (**samostalni vijećnici**)

Mujo Fafulić (**nacionalna manjina**)

**Odsutni vijećnici:** Eldin Mijoč (**SDP BiH**) i Semir Mišija (**samostalni vijećnik**)

Predsjedavajući je konstatovao da je na sjednici u momentu prijave prisutno 26 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

**Aldin Šljivo**, općinski načelnik

**Džihad Berbić**, pomoćnik općinskog načelnika za finansije

**Mirza Fazlić**, pomoćnik općinskog načelnika za privredu, urbanizam i zaštitu okoline

**Rešad Zaimović**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurčo Kurtović**, pomoćnik općinskog načelnika za imovinskopravne, geodetske poslove i katastar nekretnina

**Bahrudin Arnaut**, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

**Zijad Neimarlija**, direktor Zavoda za planiranje i izgradnju općine Kakanj

**Izjave, obrađivači, gosti:**

Mirnes Bajtarević, direktor JP „Grijanje“

Nisvet Trako, predsjednik UO JU „Dom zdravlja“ Kakanj

**Predstavnici medija:**

NTV IC Kakanj  
Radio Kakanj  
„Kakanjske novine“

„Naša riječ“  
„Kakanjlive“  
„Kakanj-x“

„Kaportal“  
„Klix portal“

Kratka saopćenja o radu sjednice i prethodnim pitanjima. U pripremi 31. sjednice Općinskog vijeća, Kolegij je razmatrao:

**a) Zahtjev za postupanje u vezi Udruženja porodica šehida općine Kakanj**

Kolegij je Zahtjev proslijedio Službi za društvene djelatnosti, borača pitanja, raseljena lica, izbjeglice i povratnike i Službi za finansije na znanje.

**b) Zahtjev „Suvenirnice“ Kakanj**

Kolegij je Zahtjev proslijedio Službi za privredu, urbanizam i zaštitu okoline i JP „Vodokom“ d.o.o. Kakanj kako bi iznašli mogućnost i udovoljili Zahtjevu.

**c) Informacija o podnesenoj tužbi članova OIK-a**

Informaciju je Kolegij primio k znanju.

**d) Odgovor Komisije za utvrđivanje naziva novih ulica općine Kakanj**

Kolegij je odlučio da ponuđeni odgovor zajedno sa prethodno razmatranim prijedlogom odluke, o kojem je Vijeće odgodilo izjašnjavanje, uputi vijećnicima na razmatranje i odlučivanje.

**e) Inicijativa građana za osnivanje MZ Bištrani**

**f) Inicijativa građana za osnivanje MZ Termoelektrana**

**g) Inicijativa građana za osnivanje MZ Plandište**

**h) Inicijativa građana za osnivanje MZ Gornja Ričica**

**i) Inicijativa građana za osnivanje MZ Kučići**

**j) Inicijativa građana za osnivanje MZ Tičići**

Inicijative građana za osnivanje novih mjesnih zajednica Kolegij je uputio Vijeću na razmatranje i usvajanje.

**Usvajanje zapisnika sa 30. sjednice Općinskog vijeća:**

Predsjedavajući je zapisnik sa 30. sjednice Općinskog vijeća stavio na glasanje, te je isti usvojen sa 23 glasa za i 1 glas uzdržan.

**Komentari na dostavljene odgovore na vijećnička pitanja:**

**Enes Piljug:** je rekao da je dobio odgovor na pitanje u vezi uklanjanja otpada uz rijeku Ribnicu. U odgovoru Službe za privredu stoji da se od JP „Vodokom“ tražila ponuda za uklanjanje otpada sa predmetne lokacije, ali u odgovoru Vodokoma stoji da zbog velikih količina odloženog raznog otpada isti nisu u mogućnosti obaviti posao zbog nepostojanja adekvatne mehanizacije. S toga je ponovo tražio od Službe za privredu da se angažuje u pronalasku preduzeća koje ima tehničke mogućnosti da izvrši uklanjanje otpada.

**Rizah Haračić:** je rekao da je dobio odgovore na dva vijećnička pitanja. Prvo pitanje je bilo upućeno Policijskoj stanici u vezi problematike učestale maloljetničke delikvencije u ulici 311. lahke brigade. Zahvalio se na odgovoru, te rekao da je Policijska stanica odmah reagovala i obezbjedila stalno prisustvo policijskih službenika u toj ulici, čime će se u znatnoj mjeri smanjiti navedeni problem. Također, pozvao je i druge nadležne institucije, prije svega tužilaštvo i sud da preuzmu sve što je u njihovoj nadležnosti kako bi se problem maloljetničke delikvencije trajnije riješio, kako u predmetnoj ulici tako i na području cijele općine. Drugi odgovor je dobio od Zavoda za planiranje i izgradnju u vezi sanacije potoka u Dumancu koji protiče kroz greblje, gdje se u odgovoru navodi da su za sanaciju potrebna sredstva od 25.000 KM kojima Zavod trenutno ne raspolaže. Zbog toga je predložio da se krene sa poslom sanacije

potoka prema finansijskim mogućnostima i naglasio da mještanima nije presudno da se kompletan posao odmah završi, ali je od značaja da se problem počne rješavati, te da se obavi u nekoliko faza u skladu sa finansijskim mogućnostima.

### **Komentari na dostavljena mišljenja na vijećničke inicijative:**

**Enes Piljug:** je rekao da je dobio odgovor na vijećničku inicijativu u vezi sanacije putne komunikacije Podgora – Modrinje. U odgovoru Zavoda se navodi da na toj putnoj komunikaciji od ranije postoje dvije sjeline koje trenutno miruju, jer su djelimično obezbjeđene zaštitnom ogradom, te da na putu postoje ulegnuća koja zahtijevaju ozbiljnu rekonstrukciju puta. Također, u odgovoru stoji da je potrebno izvršiti eksproprijaciju zemljišta kako bi se put izmjestio. U skladu s navedenim, tražio je da se postojeće sjeline dodatno obezbjede, kao i da se postojeća ulegnuća pokušaju popuniti, što bi bilo privremeno rješenje dok se ne steknu uslovi za izmještanja puta.

### **Vijećnička pitanja:**

**Safet Šahman:** je postavio dva vijećnička pitanja. Prvo zašto nije došlo do iskopa otvorenih kanala na relaciji Dom-Podborje, iako je prilikom podnošenja inicijative data usmena saglasnost za to i drugo pitanje da li će se prilikom ljetnog održavanja puteva izvršiti sanacija puteva koji su oštećeni u zimskom periodu, tačnije da li će doći do sanacije dijelova puta na relaciji kamenolom Trgošped - Podborje – Brnjic.

**Rizah Haračić:** je postavio dva vijećnička pitanja i to može li Služba civilne zaštite učestvovati u obezbjeđenju materijala za sanaciju potoka kroz greblje u Dumancu, obzirom da plan javnih nabavki te službe za 2019. godinu, predviđa nabavku betonskih cijevi i drugog građevinskog materijala, nabavku drenažnih cijevi potrebnih za poduzimanje palijativnih mjera i nabavku materijala za uređenje vodotoka cijevima  $\Phi 300$ , 400, 500 i 1000 mm. Drugo pitanje je može li Služba za privredu, urbanizam i zaštitu okoline, kao nadležna za finansiranje, izgradnju i održavanje vodnih objekata i zaštitu objekata za odvodnjavanje, iskorištavanje vode i zaštitu od zagađenja kao i izradu tehničke dokumentacije, učestvovati u finansiranju troškova sanacije potoka kroz greblje u Dumancu i u kojem iznosu.

**Rešad Merdić:** je postavio dva vijećnička pitanja. Prvo da li je važeći sporazum o redovnom održavanju saobraćajnice na potezu od džamije Donji Kakanj do kamenoloma Trgošped, potpisan između TC Kakanj, Trgošpedom, RMU Kakanj i Općinom Kakanj, ako jeste, ko vrši nadzor nad realizacijom istog. Drugo pitanje je u kojoj je fazi realizacija izrade trase puta kamenolom Trgošped – Donji Kakanj prema usvojenoj projektnoj dokumentaciji i planu nove trase puta.

**Adisa Škulj:** je postavila dva vijećnička pitanja. Prvo kada će se vratiti rasvjeta u naselju Plandište i to u dijelu od Bara do pravoslavnog groblja koja je postojala do 2000. godine i drugo kada će se realizovati sredstva za završetak radova vodovoda Varalići, te je tražila da joj se dostavi izvještaj o dosadašnjoj realizaciji i trenutnom stanju izvedenih radova na pomenutom vodovodu.

Predsjedavajući je konstatovao da je vijećnik Mugdin Gorak postavio vijećničko pitanje bez korištenja govornice.

**Mugdin Gorak:** je ponovio pitanje postavljeno na 29. sjednici Vijeća, a koje se odnosi se zamjenu rasvjetnog tijela u ulici ZPO-a broj 12, koje je oštećeno tokom sječe krošnji drveća u istoj ulici, a to rasvjetno tijelo osvjetljava stepenice koje vode prema Domu zdravlja i vrtićima.

### **Vijećničke inicijative:**

**Safet Šahman:** je podnio dvije vijećničke inicijative. Prva je da se izvrši značajnija sječa rastinja duž cijele dionice puta Donji Kakanj – Brnjic - Podborje, zbog izraženog rasta drveća i time uzrokovane velike nepreglednosti puta. Druga inicijativa je da se sačini plan realizacije sredstava usvojenih kroz Programe sa jasno definisanom dinamikom. Plan dostaviti svim vijećnicima kako bi imali uvid kada, gdje i šta se radi, a razlog za inicijativu je nezadovoljstvo načinom biranja projekata koji se trebaju realizovati.

**Rizah Haračić:** je podnio vijećničku inicijativu za pomjerenje granica lovnih područja koja se nalaze na granicama naseljenih mjesta, kao i donošenje adekvatnih odluke po tom pitanju od strane Vijeća.

**Enes Piljug:** je podnio vijećničku inicijativu da se pomogne projekat završetka kanalizacije u mjestu Kamen u vidu građevinskog materijala. Istima je potrebno oko 500 m cijevi  $\Phi$  200 kako bi se spojili sa Hausovićima i na taj način riješili problem kanalizacije.

**Evelin Bitić:** je podnio dvije vijećničke inicijative. Prva je za postavljanje sigurnosne, odnosno zaštitne ograde na dionici puta od stadiona FK „Rudar“ do mosta na rijeci Zgošća kod objekta TC „Real“, kao i na potezu od pomenutog mosta do mosta kod benzinske pumpe „Trgošped“, odnosno ispred zgrade Općine. Druga inicijativa je da se postave saobraćajni znaci na raskrsnici kod cementarskog mosta kod objekta „Maršal“, jer su vozači često u nedoumici oko prava prvenstva.

### **Utvrđivanje dnevnog reda:**

Predsjedavajući je napomenuo da je prijedlog dnevnog reda usaglašen na sjednici Kolegija koja je održana 21.05.2019. godine. U međuvremenu su pristigli materijali iz Službe za imovinskopravne, geodetske poslove i katastar nekretnina i to: Prijedlog odluke o načinu i uslovima raspolaganja nekretnine – javne prodaje neizgrađenog građevinskog zemljišta u Kaknju i Prijedlog rješenja o imenovanju Komisije za provođenje javnog nadmetanja – licitacije neizgrađenog građevinskog zemljišta u Kaknju, pa je predložio da se iste uvrste u dnevni red kao 5. i 6. tačka, a da se ostale tačke u skladu s tim pomjere.

U raspravi po predloženom dnevnom redu nije niko učestvovao, te je Vijeće jednoglasno sa 27 glasova za, usvojilo dnevni red za 31. sjednicu.

### **Usvojeni dnevni red:**

1. Prijedlog odluke o dopuni Odluke o poticajima i pogodnostima za investiranje na području općine Kakanj
2. Prijedlog odluke o davanju saglasnosti za utvrđivanje mikrolokaliteta za izgradnju poljoprivrednog centra (poslovna zgrada) na području općine Kakanj
3. Prijedlog odluke o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2019. godinu
4. Prijedlog odluke o isplati razlike sredstava studentima koji ostvare pravo na kantonalnu stipendiju za akademsku 2018/19 godinu
5. Prijedlog odluke o uslovima i načinu raspolaganja nekretnine – javne prodaje neizgrađenog građevinskog zemljišta u Kaknju
6. Prijedlog rješenja o imenovanju Komisije za šprovođenje javnog nadmetanja – licitacije neizgrađenog građevinskog zemljišta u Kaknju
7. Izveštaj o izvršenju Budžeta Općine Kakanj za period 01.01-31.12.2018. godine
8. Izveštaj o izvršenju tekuće budžetske rezerve Budžeta Općine Kakanj za period 01.01-31.12.2018. godine
9. Izveštaj o radu JU „Dom zdravlja“ Kakanj za 2018.godinu sa Izveštajem o materijalno-finansijskom poslovanju JU „Dom zdravlja“ Kakanj za 2018. godinu
10. Plan rada i razvoja JU „Dom zdravlja“ Kakanj za 2019. godinu
11. Informacija o zdravstvenom stanju stanovništva općine Kakanj za 2018. godinu
12. Informacija o realizaciji sredstava boračkim populacijama sa viših nivoa vlasti i sredstava budžeta Općine Kakanj u skladu sa Kriterijima i pozitivnim zakonskim propisima za 2018. godinu
13. Prijedlog rješenja o utvrđivanju prava vlasništva u korist Veseljka (Božidara) Markovića
14. Inicijativa građana za osnivanje MZ Bištrani
15. Inicijativa građana za osnivanje MZ Termoelektrana
16. Inicijativa građana za osnivanje MZ Plandište
17. Inicijativa građana za osnivanje MZ Gornja Ričica
18. Inicijativa građana za osnivanje MZ Kučići
19. Inicijativa građana za osnivanje MZ Tičići
20. Prijedlog odluke o utvrđivanju naziva novih ulica na području općine Kakanj

### Tačka 1.

#### **Prijedlog odluke o dopuni Odluke o poticajima i pogodnostima za investiranje na području općine Kakanj**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izjavitelj:** Mirza Fazlić, pomoćnik općinskog načelnika

U diskusiji je učestvovao Slaven Katičić.

**Slaven Katičić:** je podržao predmetni prijedlog, te rekao da smatra da bi se trebale iznaći mogućnosti da se predvide odgovarajući poticaji za investitore koji bi gradili garaže za parking ili na drugi način gradili nova parking mjesta, jer se radi o gorućem problemu u općini Kakanj.

Vijeće je usvojilo Odluku o poticajima i pogodnostima za investiranje na području općine Kakanj sa 27 glasova za, bez glasova protiv i uzdržan.

### Tačka 2.

#### **Prijedlog odluke o davanju saglasnosti za utvrđivanje mikrolokaliteta za izgradnju poljoprivrednog centra (poslovna zgrada) na području općine Kakanj**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izjavitelj:** Mirza Fazlić, pomoćnik općinskog načelnika

U diskusiji je učestvovao Enes Piljug.

**Enes Piljug:** je rekao da je ideja o gradnji predmetnog objekta pohvalna i da je treba podržati, te tražio pojašnjenje u čijem vlasništvu će biti budući objekat.

**Mirza Fazlić:** je rekao da će zgrada biti isključivo u vlasništvu Općine Kakanj, te će biti data na korištenje uz obavezu da se ista strogo namjenski koristi, pri čemu će Općina zadržati pravo nadzora nad korištenjem iste.

Vijeće je usvojilo Odluku o davanju saglasnosti za utvrđivanje mikrolokaliteta za izgradnju poljoprivrednog centra (poslovna zgrada) na području općine Kakanj jednoglasno sa 27 glasova za.

### Tačka 3.

#### **Prijedlog odluke o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2019. godinu**

**Predlagač:** Općinski načelnik

**Obradivač:** Služba za privredu, urbanizam i zaštitu okoline

**Izjavitelj:** Mirza Fazlić, pomoćnik općinskog načelnika

U diskusiji je učestvovao Jasmin Mušanović.

**Jasmin Mušanović:** je izrazio zadovoljstvo što se čine koraci ka novom zapošljavanju, te pitao da li Služba ima podatke koji je procenat pokrenutih biznisa koji se održao nakon proteka perioda poticaja i šta je glavni razlog gašenja, odnosno prestanka rada pokrenutih biznisa.

**Mirza Fazlić:** je rekao da je opstojnost pokrenutih biznisa oko 70%, a da je u proteklom periodu bilo registrovano oko 120 obrta. Razlog gašenja obrta je najčešće pronalazak novog posla ili odlazak van BiH, a vrlo mali broj je onih koji gase obrt i vraćaju na biro za zapošljavanje. U naredniom periodu će se uraditi detaljna analiza datih poticaja i provjera ispunjavanja obaveza prema odgovarajućim fondovima od strane korisnika poticaja.

Vijeće je usvojilo Odluku o izmjenama i dopunama Programa utroška sredstava iz Budžeta Općine Kakanj za podsticaj razvoja poduzetništva i obrta za 2019. godinu jednoglasno sa 28 glasova za.

#### **Tačka 4.**

#### **Prijedlog odluke o isplati razlike sredstava studentima koji ostvare pravo na kantonalnu stipendiju za akademsku 2018/19 godinu**

**Predlagač:** Općinski načelnik

**Obrađivač:** Služba za društvene djelatnosti, boračka pitanja, raseljena lica, izbjeglice i povratnike

**Izjavitelj:** Rešad Zaimović, pomoćnik općinskog načelnika

U diskusiji su učestvovali: Jasmin Mušanović i Izudin Hrusto.

**Jasmin Mušanović:** je predložio da se, ukoliko je moguće, obezbjedi isplata iznosa jedne stipendije na početku akademske godine za nabavku knjiga, jer mu je poznato da studenti imaju velike probleme da obezbjede stručnu literaturu na početku godine.

**Izudin Hrusto:** je napomenuo da pravo na kantonalnu stipendiju ne mogu ostvariti studenti koji borave u studentskom domu. Zbog toga je potrebno iznaći rješenje za te studente, jer bi oni trebali aplicirati na kantonalnu stipendiju samo formalno, obzirom da znaju da će biti odbijeni, a s druge strane to im je uslov da ostvare općinsku stipendiju.

**Rešad Zaimović:** je pojasnio da je odlukom općinskog načelnika formirana radna grupa sa zadatkom da sačini prijedlog izmjena i dopuna odluke o stipendiranju, te će izmjenjena odluka biti pripremljena do naredne akademske godine, tako da se prijedlog vijećnika Mušanovića može uzeti u obzir prilikom izrade predmetne odluke. U vezi diskusije vijećnika Hruste je rekao da je Službi poznato da studenti koji borave u studentskim domovima nemaju pravo na kantonalnu stipendiju, ali zbog toga mogu aplicirati za općinsku, tako da po tom pitanju neće biti nikakvih nejasnoća.

Vijeće je usvojilo Odluku o isplati razlike sredstava studentima koji ostvare pravo na kantonalnu stipendiju za akademsku 2018/19 godinu jednoglasno sa 27 glasova za.

Predsjedavajući je predložio da se objedini rasprava po tačkama 5. i 6. dnevnog reda, a da se glasanje obavi pojedinačno.

#### **Tačka 5.**

#### **Prijedlog odluke o načinu i uslovima raspolaganja nekretnine – javne prodaje neizgrađenog građevinskog zemljišta u Kaknju**

**Predlagač:** Općinski načelnik

**Obrađivač:** Služba za imovinskoppravne, geodetske poslove i katastar nekretnina

**Izjavitelj:** Nurčo Kurtović, pomoćnik općinskog načelnika

U diskusiji nije niko učestvovao i Vijeće je Odluku o načinu i uslovima raspolaganja nekretnine – javne prodaje neizgrađenog građevinskog zemljišta u Kaknju, usvojilo jednoglasno sa 26 glasova za.

#### **Tačka 6.**

#### **Prijedlog rješenja o imenovanju Komisije za provođenje javnog nadmetanja – licitacije neizgrađenog građevinskog zemljišta u Kaknju**

**Predlagač:** Komisija za izbor i imenovanja

**Obrađivač:** Služba za imovinskoppravne, geodetske poslove i katastar nekretnina

**Izjavitelj:** Edin Aliefendić, predsjednik Komisije za izbor i imenovanja

Komisija za izbor i imenovanja je predložila Komisiju za provođenje javnog nadmetanja – licitacije neizgrađenog građevinskog zemljišta u Kaknju u sastavu: Zerina Kovač – predsjednica, Melisa Trako, Emina Piljug, Sanel Alić, Elvedin Delić, Vinka Aletović, Nusret Muslić i Ivica Petrović – članovi.

Vijeće je usvojilo Rješenje o imenovanju Komisije za provođenje javnog nadmetanja – licitacije neizgrađenog građevinskog zemljišta u Kaknju jednoglasno sa 26 glasova za.

#### **Tačka 7.**

#### **Izveštaj o izvršenju Budžeta Općine Kakanj za period 01.01-31.12.2018. godine**

**Predlagač:** Općinski načelnik

**Obrađivač:** Služba za finansije

**Izjavitelj:** Džihad Berbić, pomoćnik općinskog načelnika

U diskusiji su učestvovali: Rešad Merdić i Rizah Haračić.

**Rešad Merdić:** je rekao da se iz izlaganja izvjestioca moglo zaključiti da su problemi na prihodovnoj strani Budžeta vezani za neostvarivanje planiranih koncesionih i vodnih naknada. Rekao je da se moglo očekivati da neće doći do naplate koncesionih naknada, jer su one vezane za potpisivanje ugovora sa Rudnikom, a što se onda odrazilo na rashodovnu stranu i realizaciju projekata planiranih iz tih sredstava. Tražio je da mu se odgovori da li je aplicirano kod kantonalnog ministarstva, odnosno da li su realizovani projekti koji se finansiraju od vodnih naknada putem nadležnog ministarstva. Drugo pitanje se odnosi na mogućnost zaključenja nagodbi kako bi se izbjegli sudski sporovi, odnosno sudska izvršenja i situacija da kamate premaše iznos glavnice.

**Džihad Berbić:** je rekao da se projekti iz vodnih naknada realizuju direktno iz budžeta Kantona, te da će u Izveštaju o realizaciji projekata od vodnih naknada biti navedeni svi projekti na koje se apliciralo, te popis onih koji su realizovani u cijelosti ili određenom procentu. Što se tiče zaključenja nagodbi, radi izbjegavanja sudskih sporova, rekao je da su nagodbe zaključivane kod manjih zahtjeva, dok kad se radi o većim iznosima tužitelji najčešće ne žele zaključenje nagodbe, jer po dobijenom sporu imaju pravo i na naplatu kamata. U svakom slučaju rekao je da bi bilo dobro povećati iznos u Budžetu za sudska izvršenja, kako bi se po dospjeću istih odmah išlo u realizaciju i na taj način umanjile isplate velikih iznosa na ime kamata.

**Rizah Haračić:** je rekao da je Izveštaj sačinjen cjelovito i pregledno, te da je Izveštaj, kao i rad Službe finansija za pohvalu.

Nakon diskusije Vijeće je Izveštaj o izvršenju Budžeta Općine Kakanj za period 01.01-31.12.2018. godine, usvojilo sa 24 glasa za, 2 glasa protiv, bez glasova uzdržanih.

#### **Tačka 8.**

#### **Izveštaj o izvršenju tekuće budžetske rezerve Budžeta Općine Kakanj za period 01.01-31.12.2018. godine**

**Predlagač:** Općinski načelnik

**Obrađivač:** Služba za finansije

**Izjavitelj:** Džihad Berbić, pomoćnik općinskog načelnika

U diskusiji nije niko učestvovao i Vijeće je Izveštaj o izvršenju tekuće budžetske rezerve Budžeta Općine Kakanj za period 01.01-31.12.2018. godine, usvojilo sa 25 glasova za, bez glasova protiv i 1 glas uzdržan.

#### **Tačka 9.**

#### **Izveštaj o radu JU „Dom zdravlja“ Kakanj za 2018. godinu sa Izveštajem o materijalno-finansijskom poslovanju JU „Dom zdravlja“ Kakanj za 2018. godinu**

**Predlagač:** UO JU Dom zdravlja Kakanj

**Obrađivač:** UO JU Dom zdravlja Kakanj

**Izjavitelj:** Nisvet Trako, predsjednik UO JU i Mirsad Tursum, direktor JU

U diskusiji su učestvovali: Rešad Merdić, Izudin Hrusto, Muhamed Kubat, Rizah Haračić i Jasmin Mušanović.

**Rešad Merdić:** je pohvalio sačinjeni Izvještaj kao i rad menadžmenta JU koji je ostvario pozitivan poslovni rezultat. Predložio je da se ubuduće u izvještaje stave uporedni pokazatelji iz prethodne godine, kako bi se moglo pratiti koliko se broj pruženih zdravstvenih usluga povećava ili smanjuje. Također, naglasio je da Vijeće i načelnik trebaju zajednički iznaći mogućnost da se riješi problem nedostatka prostora u Hitnoj pomoći, kao i da se obezbjede sredstva za učešće u participaciji socijalno ugroženih kategorija stanovništva, ratnih vojnih invalida i drugih kategorija stanovništva koji nisu u mogućnosti plaćati participaciju.

**Izudin Hrusto:** je također pohvalio menadžment za otvoreni poslovni rezultat, te izrazio iznenađenost brojem od preko 19.000 pregleda za djecu predškolskog uzrasta. Napomenuo je da se trebaju uložiti dodatni naponi od strane svih da se poveća broj doktora specijalista, a naročito pedijataru.

**Mirsad Tursum:** je rekao da se u materijalima za narednu tačku dnevnog reda nalaze uporedni podaci o broju obavljenih pregleda i broju najčešćih oboljenja u poređenju sa prethodnom godinom, te je rekao da je broj obavljenih pregleda i broj oboljenja na nivou prethodne godine, a da je jedan pacijent manje oboljeli od karcinoma, što svakako stanovništno Kaknja najviše interesuje. Istakao je bojazan da će Kakanj, kao i cijela BiH u narednim godinama ostati bez ljekara, a posebno pedijataru i neuropsihijataru koji sve više odlaze u inostranstvo. Zabrinjavajući je podatak da je svaki doktor u Domu zdravlja u prosjeku imao oko 10.000 pregleda u toku godine. Po pitanju finansiranja je rekao da se to mora rješavati na nivou kantona, odnosno da menadžment i Općina vrlo malo toga mogu promijeniti bez izmjene kantonalnih propisa koji regulišu oblast zdravstvene zaštite. Još je naglasio da je sve češća pojava da ljekari, naročito specijalisti napuštaju Dom zdravlja i odlaze van BiH ili u veće medicinske centre, nakon što u Domu zdravlja provedu par godina u period sticanja iskustva i završetka specijalizacije. Rekao je da su plaće medicinskog osoblja u proteklom periodu u više navrata povećane i da se može reći da plaće ljekara nisu osnovni razlog odlaska iz Doma zdravlja, jer su one za naše prilike i okruženje sasvim zadovoljavajuće.

**Muhamed Kubat:** je rekao da problem odlaska ljekara iz Doma zdravlja, ukoliko nije uzrokovan visinom plaće, vjerovatno je uzrokovan odnosom prema ljekarima.

**Izudin Hrusto:** je ponovio da se moraju dodatni naponi uložiti od strane svih odgovornih kako bi se zadržali ljekari ili eventualno privolili da iz drugih sredina dođu raditi u Dom zdravlja Kakanj.

**Rizah Haračić:** je pohvalio Izvještaj kao sveobuhvatan i iscrpan, ali je naglasio da se ne slaže sa konstatacijom direktora da visina plaće nije razlog odlaska ljekara iz Doma zdravlja. Smatra da je plaća najvažniji faktor koji opredjeljuje ljude gdje će raditi, te predlaže da se dodatno finansijski stimulišu deficitarni specijalisti, a pogotovo pedijatar koji obavi dva ili tri puta više pregleda od pojedinih svojih kolega.

**Jasmin Mušanović:** je rekao da bi trebali razmišljati, obzirom da je Kakanj sredina koja teži da bude prva u mnogo čemu, da se sagradi zgrada u kojoj bi se dodjelili stanovi mladim ljekarima. Uz rješavanje stambenog pitanja, potrebno im je dati odgovarajuću plaću i omogućiti specijalizaciju čim steknu uslove, te da u takvim okolnostima ljekari neće odlaziti iz Kaknja, nego naprotiv dolaziće iz drugih gradova u Kakanj. Smatra da su to uslovi koji se tim ljudima nude u inostranstvu i da oni neće imati potrebu ići bilo gdje, jer bi sve ono čemu mladi ljudi teže mogli ostvariti u Kaknju.

**Mirsad Tursum:** je rekao što se tiče mogućnosti da se ljekari angažuju iz drugih gradova da jednostavno ni u drugim gradovima nema određenih specijalista, tako da ta mogućnost ne postoji. U vezi stimulativnog plaćanja rada je rekao da se te mogućnosti koriste u skladu sa propisima i u skladu sa povećanim angažmanom ljekara, te je rekao da je sistem zdravstvene zaštite generalno u BiH veoma loše uređen, da je problem nedostatka stručnog specijaliziranog medicinskog kadra izražen u cijeloj BiH i da postoji vjerovatnoća da će se taj problem samo dodatno povećavati.

**Muhamed Kubat:** je pitao kako trenutno nema mogućnosti za slanje ljekara na specijalizaciju zbog nemogućnosti pronalaska zamjene za ljekara specijalizanta, a to nije bio slučaj u ranijim godinama.



**Mirsad Tursum:** je rekao da je problem oko slanja na specijalizaciju prisutan zadnjih 3-5 godina, dok je ranijih godina bilo nezaposlenih ljekara, te nije bio problem angažovati nekoga kao zamjenu ljekaru specijalizantu.

**Općinski načelnik:** je pohvalio diskusiju koja se vodila po predmetnom Izvještaju i rekao da iz nje svakako može prosteći dobrih i pozitivnih ideja. Jedna od takvih ideja sa neke ranije sjednice Vijeća je i plaćanje doktorske specijalizacije iz Budžeta Općine, koja je trenutno u fazi realizacije. Vezano za vođenu diskusiju je rekao da je evidentno da je najveći problem u Domu zdravlja nedostatak ljekarskog kadra i ne postojanje optimalnih uslova za rad pojedinih odjela. S tim u vezi je rekao da je u fazi razmatranja ideja gradnje novog objekta Hitne medicinske pomoći, gdje bi se na spratu tog objekta izgradili stanovi koje bi koristili ljekari koji dođu da rade u Dom zdravlja Kakanj. Na taj način bi Kakanj ponovo bio među prvima u okruženju koji bi nudio takve mogućnosti.

Nakon diskusije Vijeće je prihvatilo Izvještaj o radu JU „Dom zdravlja“ Kakanj za 2018. godinu sa Izvještajem o materijalno-finansijskom poslovanju JU „Dom zdravlja“ Kakanj za 2018. godinu jednoglasno sa 27 glasova za, bez glasova protiv i uzdržan, a vijećnik Tursum se izuzeo od glasanja.

#### **Tačka 10.**

##### **Plan rada i razvoja JU „Dom zdravlja“ Kakanj za 2019. godinu**

**Predlagač:** UO JU Dom zdravlja Kakanj

**Obradivač:** UO JU Dom zdravlja Kakanj

**Izvjestilac:** Mirsad Tursum, direktor JU i Nisvet Trako, predsjednik UO JU

U diskusiji nije niko učestvovao i Vijeće je dalo saglasnost na Plan rada i razvoja JU „Dom zdravlja“ Kakanj za 2019. godinu sa 22 glasa za, bez glasova protiv i 1 glas uzdržan, a vijećnik Tursum se izuzeo od glasanja.

#### **Tačka 11.**

##### **Informacija o zdravstvenom stanju stanovništva općine Kakanj za 2018. godinu**

**Predlagač:** UO JU Dom zdravlja Kakanj

**Obradivač:** UO JU Dom zdravlja Kakanj

**Izvjestilac:** Mirsad Tursum, direktor JU i Ibrahim Aličković, šef HES-a

U diskusiji nije niko učestvovao i Vijeće je primilo k znanju Informaciju o zdravstvenom stanju stanovništva općine Kakanj za 2018. godinu jednoglasno sa 25 glasova za.

#### **Tačka 12.**

##### **Informacija o realizaciji sredstava boračkim populacijama sa viših nivoa vlasti i sredstava Budžeta Općine Kakanj u skladu sa Kriterijima i pozitivnim zakonskim propisima za 2018. godinu**

**Predlagač:** Općinski načelnik

**Obradivač:** Služba za društvene djelatnosti, boračka pitanja, raseljena lica, izbjeglice i povratnike

**Izvjestilac:** Rešad Zaimović, pomoćnik općinskog načelnika

U diskusiji nije niko učestvovao i Vijeće je primilo k znanju Informaciju o realizaciji sredstava boračkim populacijama sa viših nivoa vlasti i sredstava Budžeta Općine Kakanj u skladu sa Kriterijima i pozitivnim zakonskim propisima za 2018. godinu sa 24 glasova za, bez glasova protiv i 1 glas uzdržan.

#### **Tačka 13.**

##### **Prijedlog rješenja o utvrđivanju prava vlasništva u korist Veseljka (Božidara) Markovića**

**Predlagač:** Općinski načelnik

**Obradivač:** Služba za imovinskopravne, geodetske poslove i katastar nekretnina

**Izvjestilac:** Nurčo Kurtović, pomoćnik općinskog načelnika

Vijeće je bez rasprave usvojilo Rješenje o utvrđivanju prava vlasništva u korist Veseljka (Božidara) Markovića jednoglasno sa 24 glasa za.

Predsjedavajući je predložio da se objedini rasprava i glasanje po tačkama 14., 15., 16., 17., 18. i 19. dnevnog reda, ukoliko iz rasprave neproistekne da bi glasanje trebalo obaviti pojedinačno.

#### **Tačka 14.**

**Inicijativa građana za osnivanje MZ Bištrani**

#### **Tačka 15.**

**Inicijativa građana za osnivanje MZ Termoelektrana**

#### **Tačka 16.**

**Inicijativa građana za osnivanje MZ Plandište**

#### **Tačka 17.**

**Inicijativa građana za osnivanje MZ Gornja Ričica**

#### **Tačka 18.**

**Inicijativa građana za osnivanje MZ Kučići**

#### **Tačka 19.**

**Inicijativa građana za osnivanje MZ Tičići**

**Predlagač:** Općinski načelnik

**Obrađivač:** Služba za opću upravu, radne i zajedničke poslove, lokalnu samoupravu i mjesne zajednice

**Izvjestilac:** Bahrudin Arnaut, pomoćnik općinskog načelnika

U diskusiji su učestvovali: Rešad Merdić, Rizah Haračić, Enes Piljug, Safet Šahman, Slaven Katičić.

**Rešad Merdić:** je pitao da li je provedena propisana procedura za izdvajanje predmetnih podružnica, jer prema njegovim saznanjima, konkretno kod osnivanja MZ Kučići, pojedini potpisnici inicijative su mu rekli da oni nisu potpisali istu, nego je to neko drugi učinio u njihovo ime.

**Rizah Haračić:** je pitao koje su prednosti i nedostaci osnivanje novih MZ, odnosno da li postoje neki uslovi za osnivanje MZ i da li su ti uslovi u konkretnim slučajevima ispunjeni.

**Enes Piljug:** je također istakao sumnju u vjerodostojnost potpisa na podnesenim inicijativama, te je rekao da smatra da je uzrok izdvajanja predmetnih podružnica nezadovoljstvo neravnomjernom raspodjelom sredstava, odnosno infrastrukturnih ulaganja među podružnicama pojedine MZ.

**Safet Šahman:** je pozvao na oprez pri proceduri usitnjavanja mjesnih zajednica, jer bi moglo doći promjena u određenim dokumentima i sl., pri čemu bi mogla nastati konfuzija i nezadovoljstvo.

**Bahrudin Arnaut:** je rekao da nema saznanja, niti je provjeravao vjerodostojnost potpisa podnosilaca inicijative, ali je naglasio da je inicijativa samo jedna inicijalna radnja koja i nema neki poseban značaj kao što to imaju zborovi građana koji su provedeni nakon podnošenja inicijativa i koji su referentna značajka gdje je iskazana istinska volja građana za realizacijom inicijative, a što je provedeno u koordinaciji sa Službom. Po pitanju prednosti i nedostataka zbog usitnjavanja mjesnih zajednica je rekao da je nekada stav Službe bio da se ide na ukupnjavanje mjesnih zajednica, ali da u principu Služba nastoji ne uticati u tom pogledu na situaciju na terenu, te da nastoji ispratiti volju građana, a u ovim slučajevima ta volja je nesporna. Razlozi za izdvajanje podružnica su najčešće nezadovoljstvo raspodjelom infrastrukturnih projekata unutar MZ, kao i u nekim slučajevima teritorijalna nepovezanost pojedinih podružnica. Što se tiče promjena u dokumentima koje mogu nastati u ovim situacijama je rekao da se vodilo računa da ne dođe do preklapanja u teritorijalnom dijelu, odnosno vodilo se računa o aktima koji definišu granice naseljenih mjesta i područja i u skladu s tim su obilježavana područja novih mjesnih zajednica. Još je rekao da nema nikakvih posebnih uslova da bi se formirala MZ i da je to formalno

moguće sa aspekta lokalne samouprave, a na Vijeću je da prihvati ili ne prihvati određenu inicijativu za tako nešto.

**Rešad Merdić:** je pitao da li je postojao dovoljan broj potpisnika za iniciranje procedure, imajući u vidu odgovor u vezi potpisa na podnesenoj inicijativi, odnosno da li se ispoštovao procenat od 10% stanovništva, što je statutarna odredba.

**Bahrudin Arnaut:** je ponovio da je zbor građana referentni događaj za realizaciju ovakvih inicijativa i da su ispoštovane odredbe Statuta Općine prilikom održavanja zborova.

**Slaven Katičić:** je rekao da ne vidi razloge da se sprječavaju građani da formiraju nove MZ, kao i da se Vijeće bavi razlozima za tako nešto. Smatra da je bitno da formirane MZ funkcionišu na terenu i na taj način ostvaruju svoje ciljeve, a da je manje bitno koliki je broj mjesnih zajednica.

**Rešad Merdić:** je rekao da on lično nije protiv formiranja novih MZ, nego da njegova saznanja sa terena govore da sami mještani naselja Kučići nisu za izdvajanje iz MZ Bijeke Vode, te je u tom smislu tražio pojašnjenja i provjere.

**Bahrudin Arnaut:** je predložio zaključak: Zadužuje se Služba za opću upravu, radne i zajedničke poslove, lokalnu samoupravu i mjesne zajednice da za narednu sjednicu Općinskog vijeća sačini prijedloge odluka o osnivanju mjesnih zajednica i to: MZ Bištrani, MZ Termoelektrana, MZ Plandište, MZ Gornja Ričica, MZ Kučići i MZ Tičići.

Nakon diskusije Vijeće je prihvatilo inicijative za osnivanje MZ Bištrani, MZ Termoelektrana, MZ Plandište, MZ Gornja Ričica, MZ Kučići i MZ Tičići i usvojilo zaključak kojim se zadužuje Služba za opću upravu, radne i zajedničke poslove, lokalnu samoupravu i mjesne zajednice da do naredne sjednice Vijeća pripremi prijedloge odluka o formiranju novih mjesnih zajednica sa 24 glasa za, bez glasova protiv i 2 glasa uzdržana.

#### **Tačka 20.**

##### **Prijedlog odluke o utvrđivanju naziva novih ulica na području općine Kakanj**

**Predlagač:** Komisija za utvrđivanje naziva novih ulica općine Kakanj

**Obrađivač:** Komisija za utvrđivanje naziva novih ulica općine Kakanj

**Izjavitelj:** Adnan Ibrahimspahić, predsjednik Komisije

U diskusiji nije niko učestvovao i Vijeće je usvojilo Odluku o utvrđivanju naziva novih ulica na području općine Kakanj sa 24 glasa za, 1 glas protiv i 1 glas uzdržan.

Predsjedavajući je čestitao nastupajući Bajram i zaključio rad 31. sjednice Općinskog vijeća u 12:40.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Ferdo Mijač

**PREDSJEDAVALAČI  
OPĆINSKOG VIJEĆA**  
Slaven Katičić